

PN aprova votu solidariedade ba Bernard Collaery



Bernard Collaery. Imajen/Espesiál.

DILI, 08 febreiru 2022 (TATOLI)—Parlamentu Nasionál, tersa ne'e liuhosi reuniaun plenária aprova votu solidariedade ba Bernard Collaery nu'udar sidadaun Australianu hodi fó rekuñesimentu ba servisu no kontribuisaun sira ne'ebé nia halo ba Timor-Leste iha tempu rezisténsia no ukun an.

“Rezultadu votasaun ba votu solidariedade ba Bernard Collaery a-favór 50 kontra no abstenasaun zero,” Prezidente Parlamentu Nasionál, Deputadu Aniceto Longuinhos Guterres Lopes, deklara iha sala plenária Parlamentu Nasionál.

Deputadu proponente, José Agostinho Sequeira ‘Somotxo’, hateten votu solidariedade ne'e ho intensaun responde servisu sakrefisú sira durante ne'e hosi halo ona hosi Bernard Collaery ho nia maluk sira ba Timor-Leste.

Nia dehan, hanesan iha segundu guerra mundiál durante povu Austálianu fó apoiu ba TimorLeste no iha tinan 1975 Bernard ho ninia maluk Australianu sira forma asosiasaun ida iha Austrália ba kampaña independensia Timor-Leste nian hodi defendepovu maubere nia direitu hodi kontra invazaun okupasaun ilegál Indonézia.

Iha 1989, Ministéiru Negósiu Estranjeiru Austrália ho Indonézia asina akordu atu explora Timor Gap ita-nia mina rai maibé Bernard ho grupu hatama keixa ba Tribunál Internasionál hodi akuza akordu ilegál tanba pertense liu ba Timor-Leste nia direitu.

Iha tempu ukun an, nia kontinua luta ba problema fronteira marítima hodi defende ka deskobre kazu espionazen iha TL ligadu estratéjia sira kona-ba *Certain Maritime Arrangements in the Timor Sea* (CMATS) ne'ebé konsege negósiu ho Austrália.

Maibé, Deputadu Somotxo hateten, aktu solidariedade simples no la interfere prosesu justisa ne'ebé daudaun la'o hasoru Bernard Collaery.

“Tanba ita hanesan ne'ebé de'it labele interfere asuntu justisa iha kada nasaun ne'ebé ita liuhosi votu aktu solidariedade simples hodi fó ba nia sakrefisú sira durante ne'e,” nia dehan.